

讀書叢錄

讀書叢錄卷十五

臨海洪頤煊

荀子楊倞注

荀子楊倞序分舊十二卷三十二篇爲二十卷又改孫卿新書爲荀卿子其篇第亦頗有移易頤煊案舊唐書經籍志孫卿子十二卷新唐書藝文志荀卿子十二卷皆非楊倞所見孫卿新書之本今本省卿字稱荀子又不知始自何人後漢書謝該傳李賢注引劉向孫卿子後序所論孫卿事楊倞本亦無之

荀子建本

困學紀聞荀子賦篇請占之五泰監本作五帝監本

未必是建本未必非頤煊案今世所傳有荀子纂圖互注宋刻巾箱本作五泰卽建本也監本乃唐與政台州所刊熙寧舊本今罕傳者

問一告二

勸學篇問一而告二謂之噴楊倞注噴卽讚字也謂以言強讚助頤煊案噴讀如曲禮長者不及毋僂言之僂謂多言也噴僂聲相近

菑然

脩身篇不善在身也菑然必以自惡也楊注菑讀爲災災然災害在身之貌頤煊案詩皇矣其菑其翳毛傳木立死曰菑考工記輪人注鄭司農云泰山平原

所樹立物爲苗聲如蔽博立梟基亦爲苗非相篇周公之狀身如斷苗苗然植立不動之貌

### 供冀

行而供冀非漬淖也楊注供恭也冀當爲翼凡行自當恭敬非謂漬於泥淖也頤煊案冀望也謂恭敬而有所冀望非以其漬於泥淖也

### 倚魁

倚魁之行楊注倚奇也奇讀爲奇偶之奇魁大也倚魁皆謂偏僻狂怪之行頤煊案倚魁卽奇瑰假借字

### 吟口

不苟篇盜跖吟口楊注吟口吟咏長在人口也說苑

作盜跖凶貪頤煊案吟口當是貪凶之譌吟字近貪  
凶字近口若如注說與下文名聲若日月句義同非  
是

弃而僂

窮則弃而僂楊注僂當爲濕方言云濕憂也字書無  
僂字韓詩外傳作弃而累也頤煊案僂卽僂字老子  
僂僂兮無所歸說文僂垂貌一曰嬾解淮南俶真訓  
孔墨之弟子皆以仁義之術教導於世然而不免於  
僂身高誘注僂身身不見用僂僂然也僂僂僂古字  
皆通用

靡儼鈗重

榮辱篇靡之儼之鈐之重之頤煊案靡與磨字通用  
非相篇鄉曲之儼子楊注儼與黝義同輕薄巧慧之  
子也鈐卽鎔字謂或磨之使輕或鎔之使重皆取變  
化陶成之義

焉廣三寸

非相篇面長三尺焉廣三寸楊注面長三尺廣三寸  
言其狹而長甚也頤煊案焉古通作安字焉卽頤字  
之假借焉廣三寸言其蹙也楊注以焉爲語助詞非  
是

節族

故曰文久而息節族久而絕頤煊案族卽族字漢書

律歷志族奏也言陽氣奏地而達物也故楊注卽以樂之節奏釋之宋本作宗族是俗人所改

府然

府然若渠匠鑿枅之於己也楊注府與俯同就物之貌或讀爲附頤煊案府聚也謂聚之於己

倏然

仲尼篇倏然見管仲之能楊注倏安也頤煊案倏與睽同說文睽暫視兒覲暫見也春秋公羊傳曰覲然公子陽生謂桓公乍見管仲之能足以託國故爲天下之大知楊注非

炊僮

可炊而僞也楊注炊與吹同僞當爲僵言可以氣吹之而僵仆頤煊案說文澆淩乾漬米也孟子曰夫子去齊澆淩而行可炊而淩乾謂不踰時楊注非

### 謫德

儒效篇若夫謫德而定次楊注謫與商同古字商度其德而定位次本或亦多作謫謫與決同謂斷決其德故下亦有謫德而序位之語頤煊案字書無謫字君道篇論德而定次量能而授官文與此同謫疑卽論字之譌正論篇圖德而定次圖謀亦論也謫字又譌作謫

### 淺帶



逢衣淺帶楊注淺帶博帶也韓詩外傳作逢衣博帶言帶博則約束衣服者淺故曰淺帶頤煊案莊子盜跖篇縫衣淺帶釋文淺帶縫帶使淺狹考工記鮑人則是以博爲淺也鄭注鄭司農云淺讀爲翦謂以廣爲狹也淺帶謂狹帶

### 解果

解果其冠楊注解果未詳或曰解果陘隘也頤煊案解與懈同果卽儻字之譌解儻猶懶惰也非十二子篇弟佗其冠弟古夷字夷佗解儻皆同聲字

### 儻然

儻然若終身之虜楊注儻字書無所見蓋環繞拘囚

之貌頤煊案億當是億字之譌說文億作億與億形相近億通作抑抑然志氣卑下故若終身之虜而不敢有他志也

莫若惠之

王制篇馬駭輿則莫若靜之庶人駭政則莫若惠之楊注惠恩惠也頤煊案惠順也

立器

司徒知百宗城郭立器之數楊注立器所立之器用也頤煊案立器當是任器之譌周禮地官載師掌任土之法以物地事任器謂賦稅之事

乘白

司馬知師旅甲兵乘白之數楊注白謂甸徒猶今之  
白丁也或曰白當爲百百人也頤煊案白卽甸字之  
譌白甸字形相近

逢蒙視

富國篇雖爲之逢蒙視詘要撓矜君廬屋妾由將不  
足以免也楊注逢蒙古之善射者言處女如善射者  
之視物謂微眇不敢正視也頤煊案逢疑作蓬下當  
脫髮字

綦

王霸篇目欲綦色耳欲綦聲口欲綦味鼻欲綦臭心  
欲綦佚楊注綦極也綦或爲甚傳寫誤耳頤煊案以

下文飲食甚厚聲樂甚大臺榭甚高園囿甚廣四句證之甚非誤字

### 減苦

臣道篇故無德之爲道也傷疾墮功減苦故君子不爲也楊注傷疾墮功減苦未詳或恐錯誤耳頤煊案傷疾卽上文事人而不順者不疾者也墮功卽忠而不順者無功者也減苦苦是敬字之譌卽疾而不順者不敬者也皆無德之道故君子不爲

### 山林險

致士篇山林險則鳥獸去之頤煊案險當作儉富國篇俗儉而百姓不一楊注儉當爲險易否君子以儉

德辟難虞注儉或作險儉險古字通用

敦惡

議兵篇則百姓莫不敦惡楊注敦厚也頤煊案敦當通作憖字廣雅釋詁憖惡也周書世俘解凡憖國九十有九國孔晁注憖惡也尚書康誥凡民罔弗憖孟子萬章下作讒方言諄憎所疾也宋魯凡相惡謂之諄憎若秦晉言可惡矣諄卽讒字之省

苓

疆國篇其在趙者剡然有苓而據松栢之塞楊注苓地名未詳所在或曰苓與靈同漢書地理志常山郡有靈壽縣頤煊案清河郡有靈縣亦當趙地魏書地

形志字作零

黨見

天論篇怪星之黨見楊注黨見頻見也言如朋黨之多頤煊案方言郭璞注黨朗也朗見猶言明見也

代宰

正論篇代宰而食楊注宰未詳頤煊案代宰當作代臯淮南主術訓磬鼓而食奏雍而徹與此上下文義相同磬臯古字通用

舌繹

藉靡舌繹楊注舌繹未詳頤煊案儀禮鄉射禮記倍躬以爲左右舌鄭注居兩旁謂之个左右出謂之舌

考工記梓人鄭司農注舌維持侯者舌繹謂縛罪人於木如繫侯於舌也

葭橐蓐尙

正名篇屋室廬庾葭橐蓐尙机筵而可以養形楊注以廬庾爲屋室葭橐爲席蓐皆貧賤人之居也尙机筵未詳頤煊案尙字當上屬爲句禮記郊特牲莞簟之安而蒲越橐鞹之尙廣雅釋詁尙加也葭橐蓐尙謂以葭橐爲蓐藉也說文机木也

溺者不問遂

大畧篇迷者不問路溺者不問遂楊注遂謂徑隧水中可涉之徑也頤煊案遂當作墜晏子春秋內篇雜

上作溺者不問墜

井里之厥

和之壁井里之厥也玉人琢之爲天子寶楊注厥也未詳或曰厥石也頤煊案說文厥發石也山海經海外北經相柳之所抵厥爲澤谿郭璞注厥掘也井里之厥井里之人掘而得之晏子春秋雜上篇作井里之困謂困窮於井里之中義亦得通

無取鉗

哀公篇無取鉗楊注未詳家語作無取鉗王肅云謂妄對不謹誠者或曰捷給鉗人之口者頤煊案方言鉗惡也南楚凡人殘罵謂之鉗



鹿布

呂氏春秋貴生篇顏闔守閭鹿布之衣而自飯牛頤  
煊案鹿卽麕字之省莊子讓王篇作苴布之衣苴卽  
麕字晏子春秋外篇晏子相景公布衣鹿裘以朝公  
曰夫子之家若此其貧也是奚衣之惡也鹿裘亦謂  
麕裘也

默守

論人篇意氣宣通無所束縛不可收也高誘注收守  
畢氏沅曰收疑當作牧與韻叶牧亦訓守頤煊案收  
當是默字之譌言意氣宣通無所束縛不可以默守  
也默字與上下文測息塞得服極惑革匿韻合

志嫌

適音篇大小則志嫌以嫌聽小則耳不充頤煊案嫌與嫌同禮記坊記貴不嫌於用鄭注嫌或爲嫌孟子公孫丑吾何嫌乎哉趙歧注嫌少也以小聽小故耳不充與上太鉅則志蕩以蕩聽鉅則耳不容文義相對

質當爲夔

古樂篇帝堯立乃命質爲樂質乃效山林谿谷之音以歌高注質當爲夔頤煊案劉寬碑復使五官中郎將何夔持節魏上尊號奏太僕臣夔夔與質古文聲形相似因譌

農功

音律篇仲呂之月無聚大衆巡勸農事頤煊案農事當作農功與下文草木方長無攜民心合韻事字涉注文而譌

狼入於邦

明理篇有狼入於國有人自天降頤煊案國當作邦邦降合韻此避漢諱所改

連反

蕩兵篇連反兵也頤煊案莊子天下篇而連狝無傷也釋文狝本亦作林皆宛轉貌一云相從之貌謂與物相從不違故無傷連反卽連狝也宛轉相從而兵

卽伏之故曰連反兵也漢書地理志河南滎陽卞水  
水經注作汭水卞反古字通用

捷於肌膚

論威篇其藏於民心捷於肌膚也高注捷養也畢氏  
沅曰注疑未是捷或當爲挾頤煊案捷古字通作接  
爾雅釋詁接捷也郭璞注捷謂相接續也荀子解蔽  
篇雖億萬已不足以挾萬物之變楊倞注挾或爲接  
其義亦通

處

愛士篇陽城胥渠處高注處猶病也畢氏沅曰注以  
處訓病未見所出頤煊案處當作劇上脫一病字注

當作劇病甚也其義方合史記荀卿列傳劇子集解  
應劭氏姓注直云處子古字多通用

越王授

審已篇越王授有子四人高注越王授句踐五世之  
孫頤煊案史記越王句踐世家句踐五世孫爲王之  
侯貫生篇越人三世殺其君王子搜患之卽其人搜  
授侯三字聲皆相近

虞與娛同

忠廉篇利不足以虞其意矣高注虞猶回也頤煊案  
虞無回訓虞與娛同莊子讓王篇許由虞於頤濱釋  
文虞本作娛孟子盡心驩虞如也丁音驩虞義當作

歡娛古字通用耳

投

去尤篇莊子曰以瓦投者翔以鉤投者戰以黃金投者殆頤煊案字書無投字說文毀絲擊也从殳豆聲古文投如此投卽毀字列子黃帝篇投並作樞張湛注互有所投曰樞樞卽投假借字莊子達生篇作注淮南說林訓作鉉注亦投也字形相近合譌作投

旄象之約

本味篇旄象之約高注約飾也以旄牛之尾象獸之齒以飾物也一日約美也旄象之肉美貴異味也頤煊案約當爲白聲之誤也文選張景陽七命髦殘象

白詩韓奕正義引陸璣疏熊脂謂之熊白則髦象之脂皆可謂之白也

甘櫨

箕山之東青鳥之所有甘櫨焉高注箕山許由所隱也在潁川陽城之西青鳥崑崙山之東二處皆有甘櫨之果頤煊案櫨當作櫨因字形近而譌山海經海外北經郭璞注引作有甘柎焉柎音柎黎之柎淮南墜形訓昆侖華丘爰有遺玉青馬視肉楊桃甘櫨字皆作櫨史記司馬相如列傳索隱引應劭曰伊尹書云箕山之東青鳥之所有盧橘夏熟始譌作櫨字說文櫨字下有伊尹曰果之美者箕山之東青鳧之所

有櫨橘焉夏孰也二十二字疑後人據應劭注驛人非許氏原文

馬郡盡

長攻篇襄子謁於代君而請觴之馬郡盡高注襄子告代君而請飲之酒醉而殺之盡取其國也故曰馬郡盡也頤煊案馬郡盡者謂盡馬郡之人而皆觴之高注非

孔子不以力聞

慎大覽孔子之勁舉國門之關而不肯以力聞高注孔子以一手捉城門關顯而舉之不肯以有力聞於天下頤煊案墨子非儒下篇孔丘爲魯司寇舍公家



而於季孫季孫相魯君而走季孫與邑人爭門關決  
植列子說苻篇淮南道應訓主術訓皆言此事或說  
卽左氏聊人紇事是孔子之父非是

發酒

報更篇晉靈公欲殺宣孟伏士於房中以待之因發  
酒於宣孟高注發猶致也頤煊案發當讀如檀弓晉  
獻文子成室諸大夫發焉之發蓋飲酒禮名

王孫滿幼

悔過篇王孫滿要門而窺之高注要徼也頤煊案左  
氏僖三十三年傳作王孫滿尙幼觀之此當讀作王  
孫滿要句門而窺之句楚辭湘君篇美要眇兮宜修

漢書元帝紀窮極幼眇師古曰幼眇讀曰要眇要卽  
幼假借字

莫人不能

審分覽莫人不能全乃備能也夫其不全也頤煊案  
莫古通作謨字謂有謀之人不自恃其能至全乃備  
能也與上文義相應高注非

驪馬

執一篇今御驪馬者使四人人操一策則不可以出  
於門閭者不一也高注驪馬駢馬也在中日服在邊  
曰駢頤煊案漢書平帝紀立輅併馬服虔曰併馬驪  
駕也後漢書寇恂傳恂以輦車驪駕轉輸前後不絕

李賢注驪駕併駕也一車兩馬併駕故有四馬高注  
以爲駢馬失之

義翟

高義篇是以義翟也義翟何必越於中國亦可畢氏  
沉曰墨子魯問篇作是我以義難也鈞之難亦於中  
國耳何必於越哉此兩翟字訛耀字無攷當是難字  
之譌顧焯案翟難皆耀字之譌謂是我以義炫耀於  
人何必越

以爲繼矣

適威篇知其能力之不足也則以爲繼矣以爲繼知  
畢氏沉曰此二句疑當作則難以爲繼矣難以爲繼

脫兩難字下知字衍頤煊案繼當是繼字之譌劉古  
絕字下知字當在下句以爲繼上言知能力之不足  
則自以爲絕矣知以爲絕則上又從而罪之義亦得  
通

雙於前

名類篇南家之牆雙於前而不直高注雙猶出曲出  
子罕堂前也頤煊案雙當作讐漢書灌夫傳晉灼注  
讐當也

謂勤也

開春論周厲之難天子曠絕而天下皆來謂矣高注  
謂天子也頤煊案爾雅釋詁謂勤也

稭米

審時篇稭米而不香頤煊案字書無稭字稭當是稭字之譌說文稭春粟不漬也

周鼎

周鼎見於呂氏春秋者五達鬱篇周鼎著鼠令馬履之慎勢篇周鼎著象先識篇周鼎著饕餮有首無身離謂篇周鼎著倭而齧其指適威篇周鼎有竊曲狀甚至上下皆曲淮南本經訓周鼎著倭使銜其指所見與離謂篇同

短褐

賈誼新書過秦下篇夫寒者利短褐頤煊案史記始

皇本紀作𥞵褐集解徐廣曰一作短小襦音豎方言  
𥞵褌其短者謂之𥞵襦廣雅釋器復襦謂之襜褕卽  
𥞵字列子力命篇衣則𥞵褐釋文𥞵復襦也楚人謂  
袍爲𥞵有本作短褐者誤

### 安土

安土息民以待其弊頤煊案始皇本紀作安土息民  
以待其敝索隱賈誼書安作案然則今本作安土者  
是後人改也荀子勸學篇安特將學雅識志順詩書  
而已耳楊倞注安或作案古字通用

### 世世

益壤篇此世世之利也頤煊案漢書賈誼傳作二世

後漢書鄧騭傳李賢注古書字當再讀者卽於上字之下爲小二字今歧州石鼓銘凡重言者皆爲二字此當作世世後人誤乙爲二世非是

倫猥

制不定篇特賴其尙幼倫猥之數也頤煊案後漢書鄧禹傳李賢注引漢官儀曰其次下土小國侯以肺腑親公主子孫奉墳墓於京師亦隨時朝見是爲限諸侯倫猥之數謂等於限諸侯之數猥與限同

衛侯燬

審微篇衛侯更其名曰嬀頤煊案史記衛世家立戴公弟燬爲衛君左氏僖二十五經衛侯燬卒說文燬

火也从火毀聲春秋傳曰衛侯燬史記集解引賈誼書亦作燬燬是燬之俗字

### 苟容

階級篇廉恥不立則且不自好苟容而可頤煊案賈誼傳作苟若而可若是容字之譌小顏注若猶然若當通作諾字

### 請室

盤水加劍造寢室而請其罪爾頤煊案寢室當依賈誼傳作請室應劭曰請室請罪之室蘇林曰音絜清胡公漢官車駕出有請室令在前先驅此官有別獄也



別

俗激篇今其甚者別大父矣別大母矣蹀嫗矣刺兄矣頤煊案賈誼傳作今其甚者殺父兄矣別卽殺也俗刻本兩別字皆作則誤

緹以偏諸

孽產子篇緹以偏諸頤煊案賈誼傳作緹以偏諸晉灼日以偏諸緹著衣也師古曰緹音妾謂以偏諸緹著之也說文緹帛丹黃色也謂以緹帛爲偏諸其義亦通

顧還面

傳職篇白執器無函顧還面頤煊案禮記玉藻唯君

面尊少儀尊壺者面其鼻面向也顧還面謂回環視其所當向之面也

### 瞽史

保傅篇瞽史誦詩頤煊案大戴禮保傅篇作鼓夜誦詩夜是史字之譌禮容篇吾非瞽史也焉知天道周禮大行人九歲屬瞽史諭書名國語楚語臨事有瞽史之道皆瞽史二字連文是其證

### 掉磬

容經篇行以微磬之容臂不搖掉頤煊案禮記內則鄭注雖有勤勞不敢掉磬義卽本此釋文引隱義云齊人以相絞訐爲掉磬崔云北海人謂相激事爲掉

磬非也

在小不塞

故至人者在小不寶在大不窺頤煊案大戴禮王言篇布諸天下而不窺內諸尋常之室而不塞管子宙合篇其處大也不窺其大小也不塞淮南汜論訓舒之天下而不窺內之尋常而不塞寶當是塞字之譌

惓惓養心

勸學篇則雖王公大人就能無惓惓養心而願一視之頤煊案淮南脩務訓引此段畧同作則雖王公大人有嚴志頡頏之行者無不惓惓養心而悅其色矣高誘注惓惓貪欲也養心煩悶也廣雅釋訓惓惓懷

憂也楚辭謬諫篇心怵憚而煩冤今王逸注怵憚憂  
愁貌怵憚憚怵皆卽怵憚之譌養癢通用字

反嚴爲戰

道術篇臨制不犯謂之嚴反嚴爲戰頤煊案戰當是  
戰字之譌莊子達生篇桓公戰然而笑釋文司馬云  
戰笑貌

持斗

胎教雜事篇太宰持斗而御戶右頤煊案大戴禮保  
傳篇舊本亦作持斗盧辨注斗所以斟穆天子傳佐  
者承斗郭璞注斗斟水杓也詩行葦酌以大斗釋文  
本文又作料史記趙世家使厨人操銅料正義料其形

方有柄取斟水器孔氏廣森大戴本改斗作升非是

讀書叢錄卷十六

臨海洪頤煊

淮南子注

淮南子二十一卷隋書經籍志一云許慎注一云高誘注陳振孫書錄解題云今本記題許慎注而詳序文卽是高誘頤煊案魏書劉芳傳引孟春令云迎春於東郊許慎云東郊八里郊也高誘云迎春氣於東方八里郊也孟夏令云迎夏於南郊許慎云南郊七里郊也高誘云南郊七里之郊也孟秋令云迎秋於西郊許慎云西郊九里郊也高誘云西郊九里之郊也孟冬令云迎冬於北郊許慎云北郊六里郊也高

誘云北郊六里之郊也兩注並行非一書明矣

响諭

原道訓响諭覆有萬物羣生高誘注响諭溫恤也頤  
煊案禮記樂記煦妪覆有萬物鄭注氣曰煦體曰妪  
正義天以氣煦之地以形妪之是天煦覆而地妪育  
故言煦妪覆有萬物也响諭卽煦妪古字通用

大丙

昔者馮夷大丙之御也高注丙或作白頤煊案丙當  
是丙字之譌大丙卽大豆呂氏春秋聽言篇造父始  
習於大豆丙豆聲相近說文匚从匚丙聲徐鉉曰丙  
非聲義當从丙會意亦其證

扞抱

扶搖扞抱羊角而上高注扞抱引戾也頤煊案扞抱亦作軫輶文選七發李善注引淮南許慎注軫轉也玉篇輶戾也廣雅釋訓軫輶轉戾也輶卽輶字之譌

碁衛

轡碁衛之箭高注碁美箭所出地名也衛利也頤煊案碁當作淇兵畧訓淇衛箇輅高注淇衛箇輅箭之所出也淇在衛地故曰淇衛

貞蟲

蚊虻貞蟲高注貞蟲細腰之屬說山訓貞蟲之動以毒螫高注貞蟲細腰蜂蜾蠃之屬無牝牡之合曰貞



頤煊案貞蟲不專是蜂貞蟲猶言昆蟲墜形訓萬物  
貞蟲各有以生大戴禮易本命作昆蟲昆蟲卽衆蟲  
也

連嶠

終身運枯形于連嶠列埒之門高注連嶠猶離嶠也  
委曲之類列埒不均平也頤煊案說文廛屋麗廛也  
列子力命篇居則連櫬莊子徐無鬼篇君亦必無陳  
鶴列於麗譙之間郭象注麗譙高樓也皆同聲通用  
字廣雅釋室埒隄也高注非

解構

倣真訓孰肯解構人間之事以物煩其性命乎高注

解構猶合會也。頤煊案後漢書隗囂傳勿用傍人解  
構之言。竇融傳亂惑真心轉相解構。莊子肱篋篇解  
垢同異之變。詩野有蔓草邂逅相遇。綢繆見此邂逅  
其音義並同。

唯體道能不敗

孟門終隆之山不能禁。唯體道能不敗。頤煊案下湍  
瀨旋淵呂梁之深不能留也。太行石澗飛狐句望之  
險不能難也。與上孟門終隆之山不能禁三句連文。  
不應有唯體道不能敗句。禁下疑脫也。字此六字涉  
上注而譌。

鋪鮮

華藻鋪鮮高注鑄今之金尊也頤煊案鑄當是鋪字之譌卽敷字易說卦震爲勇釋文干寶注勇花之通名爲鋪花朵謂之敷華藻鋪鮮皆謂其刻鏤之美非金尊也

外景內景

天文訓明者吐氣者也是故火曰外景幽者含氣者也是故水曰內景頤煊案大戴禮天圓篇明者吐氣者也是故外景幽者含氣者也是故內景故火曰外景而金水內景張衡靈憲曰譬猶火月譬猶水火則外光水則含景此本作火曰外景水月內景兩曰字是俗人所改

四守

紫宮太微軒轅咸池四守天阿高注皆星名下自解  
頤煊案下文太微者太一之庭也紫宮者太一之居  
也軒轅者帝妃之舍也咸池者水魚之囿也天阿者  
羣神之闕也四宮者所以爲司賞罰高注四宮紫宮  
軒轅咸池天阿此天阿上不應有四守二字當是衍  
文涉下四宮而譌

中央天

中央曰鈞天其星角亢氐頤煊案二十八宿皆隨斗  
杓所指而言角亢氐離斗杓最近故古法以此三星  
爲中央天

四仲四鉤

太陰在四仲則歲星行三宿太陰在四鉤則歲星行二宿高注仲中也四中謂太陰在卯酉子午四面之中也丑鉤辰申鉤巳寅鉤亥未鉤戌謂太陰在四角頤煊案開元占經卷二十二引注云太陰謂太歲也四仲子午卯酉也假令歲陰在卯星守須女虛危故曰三宿四鉤謂丑寅爲一鉤辰巳爲一鉤未申爲一鉤戌亥爲一鉤假令歲陰在寅歲星在斗牛故曰二宿下文云子午卯酉爲二繩丑寅辰巳未申戌亥爲四鉤足與今本互相證

淮南元年

淮南元年冬太一在丙子冬至甲午立春丙子頤煊  
案漢書淮南王傳文帝十六年迺徙阜陵侯安爲淮  
南王是年歲在丁丑而云太一在丙子者據冬至在  
年前立算從冬至甲午距立春四十三日而得丙子  
以節氣盈縮故下文云日冬至子午夏至卯酉壬午  
冬至甲子受制木用事亦四十三日而得立春也

### 尚菜

覽冥訓夫瞽師庶女位賤尚菜高注菜者菜耳菜名  
也幽冀謂之檀菜雒下謂之胡菜主是官者至微賤  
也頤煊案周禮天官典臬掌布總縷紵之麻草之物  
是庶女爲之賈疏臬麻也菜卽臬字

眇眇

卧倨倨興眇眇高注倨倨卧無思慮也眇眇然視無智巧貌也頤煊案眇眇當是盱盱之譌盱說文作眇與眇字形相近倨盱合韻莊子寓言篇老子曰而睢睢而盱盱而誰與居廣雅釋訓睢睢盱盱氣也

恒娥

羿請不死之藥於西王母恒娥竊以奔月頤煊案歸藏云昔常娥以不死之藥服之遂奔爲月精恒改爲常是漢人避諱字張衡靈憲作姮娥說文無姮字後人所造

上多故

主術訓是以上多故則下多詐高注故詐頤煊案原  
道訓不設智故而方圓曲直弗能逃也高注智故巧  
飾也倣真訓不以曲故是非相見高注曲故曲巧也  
本經訓懷機械巧故之心而性失矣倣真訓巧故萌  
生呂氏春秋下賢篇空空乎其不爲巧故也故當訓  
爲巧不爲詐也

### 擊戾

曲得其宜無所擊戾高注擊掌也戾破也頤煊案荀  
子脩身篇行而俯項非擊戾也尙書益稷戛擊鳴球  
文選長楊賦作拮隔韋昭曰古文隔爲擊擊戾卽隔  
背高注非



言言錄卷十六  
六  
意而不戴

繆稱訓凡行戴情雖過無怨不戴其情雖忠來惡高  
注戴心所感也又云意而不戴中心必有不合者也  
高注意恚聲戴嗟也頤煊案下文上意而民載誠中  
者也高注上有意而未言則民皆載而行之古字載  
戴通用凡行戴情謂行載其情意而不戴謂上有意  
民不載而行之是必中心之不合也兩注非

照認

目之精者可以消澤而不可以照認高注昭道認誠  
也不可以教導戒人頤煊案上文可以形勢接而不  
可以照認齊俗訓日月之所照認鹽鐵論相刺篇天

設三光以照記昭照古字通用認卽記字高注失之  
銖而無刃

齊俗訓其兵戈銖而無刃高注楚人謂刃頓爲銖頓  
煊案說文殊死也从攴朱聲漢令蠻夷長有罪當殊  
之漢書高帝紀其赦天下殊死以下銖卽殊假借字  
隅皆

衣足以覆形不務於奇麗之容隅皆之削頤煊案皆  
當作些本經訓衣無隅差之削高注隅角也差邪也  
些差聲相近晏子春秋諫下篇衣不務於隅毗之削  
毗卽皆之譌字

杓

道應訓孔子勁杓國門之闕高注杓引也古者縣門下從上杓引之者難也顧煊案杓當作杓說文杓疾擊也从手勺聲兵畧訓爲人杓者死高注杓所擊也史記天官書杓雲如繩者居前亘天索隱說文音丁了反許慎注淮南云杓引也今諸本皆譌作杓

### 女重

汜論訓古者人醇工麗商樸女重高注女重貞正無邪也顧煊案大戴禮王言篇民敦工璞商慤女憧重卽童字童憧古通用謂憧愿無知之貌

### 季襄

季襄陳仲子立節抗行不入洿君之朝不食亂世之

食遂餓而死高注季襄魯人孔子弟子頤煊案史記仲尼弟子列傳公皙哀字季次孔子曰天下無行多爲家臣仕於都唯季次未嘗往季次當作季哀襄又哀字之譌

考

夫夏后氏之璜不能無考高注考瑕釁也說林訓白璧有考高注考釁汚也頤煊案考當作耆說文耆老人面如點也从老省占聲與玷字通用譌脫作考

勒

勒率隨其蹤跡高注勒主問吏又云勒問其故曰而盜金於市中何也高注勒主問吏頤煊案漢書主問

吏無名爲勒者勒當是鞠字之譌張湯傳訊鞠論報師古曰鞠問也鞠字譌脫作勒

行成獸

詮言訓行成獸高注謂古禮執羔麋鹿取其跪乳羣而不黨頤煊案行成獸言有迹可法

腐荷

兵畧訓腐荷之矰高注荷蓮華也矰猶矢也頤煊案詩澤陂有蒲與荷鄭箋芙蕖之莖曰荷證類本草引陸璣疏亦作其莖曰荷蓮華不可以爲矢高注非

詭

雖詭合刃於天下誰敢在於上者高注詭卒也雖卒

然合與天下爭人誰敢在其上者頤煊案說文詵相呼誘也从言兆聲廣雅釋詁詵誘也

### 噬狗

說山訓亡者不敢夜揭炬保者不敢畜噬狗高注保城郭居也保饒人也不敢畜噬人狗也頤煊案保酒家傭也鷓冠子世兵篇伊尹酒保韓非子外儲說右上篇宋人有酤酒者升甔甚平遇客甚謹爲酒甚美著然不售酒酸問其所知長者楊倩倩曰汝狗猛邪曰狗猛則酒何故而不售曰人畏焉或令孺子懷錢挈壺甕而往酤而狗迓而齧之此酒所以酸而不售也是說其事高注非

來乍

說林訓獫狁之捷來乍高注乍暫疾以其操捷來使疾擊而取之頤煊案乍當作窄繆稱訓獫狁之捷來措漢書梁平王傳晉灼曰許慎云措置字借以爲窄耳莊子應帝王篇獫狁之便執縶之狗來藉釋文司馬云藉繩也由捷見結縛也崔云藉繫也措藉亦聲相近

淮南八公

史記淮南列傳索隱引淮南要畧云安養士數千高才者八人蘇非李尙左吳陳由伍被毛周雷被晉昌號爲八公頤煊案要畧無此文唯高誘序見此八人

陳由作田由毛周作毛技唐本序在要畧後故索隱以爲要畧文

齊陶之縑

鹽鐵論本議篇非獨齊陶之縑蜀漢之布也頤煊案陶卽定陶不聞出縑陶當是阿字之譌淮南脩務訓衣阿錫史記司馬相如列傳被阿錫集解漢書音義阿細縑也正義東阿出縑

販牛

通有篇弦高飯牛於周頤煊案飯是販字之譌史記秦本紀鄭販賣賈人弦高持十二牛將賣之周淮南汜論訓鄭賈人弦賈將西販牛道遇秦師於周鄭之



間皆其證

瓠刺

非鞅篇瓠刺之鑿雖公輸子不能善其柄頤煊案申  
韓篇若隰枯輔檠之正弧刺也瓠瓠皆當是瓠字之  
譌周禮形方氏鄭注華讀爲瓠哨之瓠正之使不瓠  
邪賈疏瓠者兩頭寬中狹邪者謂一頭寬一頭狹廣  
雅釋詁刺表也

不鄰

刺復篇昔周公之相也謙卑而不鄰頤煊案鄰是遴  
字之譌論語泰伯如有周公之美使驕且吝易蒙以  
往吝說文引易作遴漢書地理志民以貪遴爭訟師

古曰遴與吝同

夏不失複

輕重篇夏不失複冬不離窟頤煊案說文復地室也从穴復聲詩曰陶復陶穴淮南汜論訓古者民澤處復穴高誘注復穴重窟也禮記月令鄭注古者複穴正義複穴者謂窟居也三字通用

賴民

毀學篇苟非其人簞食豆羹猶爲賴民也頤煊案論語子張未信則以爲厲已也鄭注厲讀爲賴左氏昭四年遂城賴公羊穀梁作厲古厲賴通用賴民卽厲民論語王肅注厲病也

蔬糲

孝養篇故飯蔬糲者不可以言孝頤煊案蔬是蔬字之譌說文疋通也从爻从正正亦聲蔬菜之蔬或作莩故又譌爲莩字俗本音奸非也

堊憂

散不足篇堊憂壁飾頤煊案堊憂當是堊憂之譌爾雅釋宮牆謂之堊說文堊白塗也釋名釋宮室篇堊亞也次也先泥之次以白灰飾之也憂古之善塗人也

唐綈

唐綈追人頤煊案說文鏑綈火齊也唐綈卽鏑綈通

用字蓋用珠綵裝飾人物以爲戲弄之具玉篇饍饍餌也是以餅爲之

### 蟬櫻

古者推車無柔棧輿無植及其後士大夫則單複木具頤煊案非鞅篇推車之蟬櫻負子之教也淮南說林訓古之所爲不可更則推車至今無蟬匱高誘注匱車類讀如孔子射于矍相之矍單複當是蟬櫻之譌廣雅釋器輶輶輶也皆字異而音義並同

### 登得

結和篇登得前利不念後咎頤煊案登得卽貪得禮記大學一人貪戾鄭注戾之言利也春秋傳曰登戾

之何休公羊注登讀言得是以登得爲貪得也

### 駕說

法言學行篇仲尼駕說者也舊注駕傳也頤煊案淮南繆稱訓子庭騰辭高誘注騰傳也後漢書隗囂傳帝數騰書隴蜀皆與駕說義同

### 分其弓

羿逢蒙分其弓頤煊案分其弓與下文良捨其策般投其斧對言之分當是解散之名素問五常政大論分潰癰腫王砭注分裂也與解散義近

### 桐子

師哉師哉桐子之命也頤煊案桐讀爲通師者所以

開通子之性命漢書禮樂志桐生茂豫師古曰桐讀爲通廣陵胥王傳毋桐好逸師古曰桐輕脫之貌也輕脫卽通脫隸釋史晨後碑桐車馬於瀆上桐卽通字皆其證

### 別

吾子篇聖人虎別其文炳也君子豹別其文蔚也頤煊案易革作虎變豹變變古通作辨字周禮小宰聽稱責以傳別鄭注傳別故書作傳辨列子楊朱篇我又欲與若別之張湛注別猶辨也別辨變三字通用

### 捫茹

脩身篇簞瓢捫茹舊注謂以手捫蒞茹也頤煊案捫

古通作掇字禮記檀弓啜菽飲水爾雅釋言啜茹也郭璞注啜者拾食與掇字同義廣雅釋詁茹食也舊注失之

盍勢諸

問神篇或曰君子病沒世而無名盍勢諸名卿可幾也頤煊案勢當是執字之譌執古藝字謂藝習其業名卿可冀得也

久幽

問明篇久幽而不改其操頤煊案論語憲問久要不忘平生之言久幽卽久要爾雅釋地燕曰幽州釋文李巡云燕其氣深要故曰幽幽要也詩七月四月秀

要夏小正作莠幽文選東京賦澤汭幽荒幽荒卽要  
荒幽要古字通用

開跡

五百篇若是則仲尼之開跡諸侯也非邪頤煊案詩  
載驅齊子發夕毛傳發夕自夕發至旦次章齊子豈  
弟鄭箋豈弟猶言發夕也爾雅釋言愷悌發也此開  
跡猶言愷悌謂孔子旦夕發跡於諸侯之國也

鍾鼓不𤑔

先知篇鍾鼓不𤑔頤煊案𤑔當是𤑔字之譌文選吳  
都賦鍾鼓之𤑔𤑔有殷李善注𤑔𤑔大聲也長門賦  
聲𤑔𤑔而似鍾音李善注𤑔𤑔聲也𤑔與𤑔同



改赴

白虎通爵篇忽者鄭伯也此未踰年之君當稱子嫌爲改赴故名之也頤煊案當時以鄭伯赴告故書鄭伯若稱子是爲改赴文義本明析盧氏文昭校本據何休公羊注改作嫌爲改伯從子故名之也非是

死後加王

故尙書曰王麻冕黼裳此大斂之後也何以知王從死後加王也以尙書言迎子釗不言迎王也盧氏校本作何以知不從死後加王也頤煊案何以知王句從死後加王也句文義本明若改王作不死後與大斂後無以異當從舊本爲是

銅琯

尚書曰再拜興對乃受銅琯頤煊案今本尚書銅作同三國志虞翻傳裴松之注引翻條奏鄭注尚書今經益金就作銅字與此本正同周禮典同掌六律六同之和鄭注故書同作銅銅同亦通用字

不施予一人

號篇故尚書曰不施予一人盧氏文昭曰卽盤庚不揚予一人之駁文頤煊案詩皇矣施于孫子鄭箋施猶易也延也施讀爲弛爾雅釋詁弛易也郭璞注相延易盤庚揚當作易與此施字義合

竈以雉

五祀篇一說戶以羊竈以雉盧氏校本據通典改作  
竈以雞云說題辭雉爲積陽南方之象頤煊案易說  
卦離爲雉離南方火象義亦得通

### 咸池

禮樂篇黃帝曰咸池者言大施天下之道而行之天  
之所生地之所載咸蒙德施也頤煊案此以池爲施  
之假借字禮記樂記咸池備矣鄭注池之言施也周  
禮大司樂鄭注咸池言其德無所不施皆同此說

### 短足

封公侯篇不忍使親屬無短足之居頤煊案短當是  
佞字之譌說文佞立也从人亼聲讀若樹一切經音

義卷十七駐古文作住對亘逗四形

無射

五行篇射者終也言萬物隨陽終也頤煊案上下文所釋皆取同聲字終當是釋字之譌禮記射義射之爲言釋也爾雅釋詁射厭也釋文射本作斃詩清廟無射於人斯禮記大傳鄭注引作無斃斃釋射三字皆同聲

伯諫

諫諍篇伯諫盧氏校本據初學記改作陷諫頤煊案淮南人間訓陽虎將舉劔而伯頤高誘注伯迫也伯諫謂迫切而諫下文伯諫者義也惻隱發於中直言

國之害勵志忘生爲君不避喪身與迫切義近伯或作陌因又譌作陷字

### 芝蓋

考黜篇車者謂有赤有青之蓋朱輪頤煊案之當作芝文選西京賦芝蓋九葩薛綜注以芝爲蓋蓋有九葩之采也思立賦左青瑠以捷芝兮舊注芝小蓋也蔡邕獨斷三蓋車名耕根車一名芝車親耕藉田乘之

### 貪狼

或曰惡人貪狼重土頤煊案淮南要畧秦國之俗貪狼高誘注狼荒也史記律書狼者言萬物可度量斷

萬物故曰狼孟子滕文公上樂歲粒米狼戾禮記大學一人貪戾鄭注戾之言利也貪狼卽貪戾也

### 四方

商賈篇尙書曰肇牽車牛遠服賈用方言遠行可知也頤煊案用方當是四方之譌四方言遠其行可知以證賈亦有行義下文方言欽厥父母欲留供養之也方讀如論語遊必有方之方是釋止曰賈正義

### 喜在西方

情性篇喜在西方怒在東方好在北方惡在南方哀在下樂在上頤煊案漢書翼奉傳北方之情好也好行貪狼申子主之東方之情怒也怒行陰賊亥卯主

之南方之情惡也惡行廉貞寅午主之西方之情喜也喜行寬大己酉主之上方之情樂也樂行姦邪辰未主之下方之情哀也哀行公正戌丑主之當是齊詩說

闕闕

四時篇二帝爲載三王爲年皆謂闕闕頤煊案謂當作有闕通作虧字闕是闕字之譌虧缺謂歲三百六十有六日其餘分以置閏下文春秋傳曰三月之喪其實二十五月是知有闕闕之證

帷

紼冕篇冠者帷也所以帷持其髮也頤煊案帷卽帑

字說文帑囊也史記滑稽列傳帑鞬鞬集解徐廣  
曰帑收衣裏也說文冠綦也綦攘臂繩也謂以繩束  
持其髮帑帑綦三字音義並同